

- प्रदेश मांय नगर निकाय चुनाव खातिर काले अधिसूचना जारी व्हेला-31 अगस्त ताई नामाकन दाखिल हो सकेला।
- मतदाता जागरूकता खातिर स्वीप गतिविधियां रे तैत आज भी केई कार्यक्रम राख्या गया-नवाचार रे जरिए मतदान रो कर्तव्य याद दिलायो गयो।
- मुख्यमंत्री भजन लाल शर्मा कह्यो -वाणी सरकार महिला सुरक्षा अर विकास सारु प्रतिबद्ध है।
- प्रदेशभर मांय ईद मिलादुन्नबी आज अकीदत अर अहतराम के साथै मनाई गई -रक्षा बंधन ने ले र तैयारियां जोरां माथे है।

000

प्रदेश मांय नगर निकाय चुनाव खातिर काले अधिसूचना जारी होणे रे साथै ही नामाकन दाखिल करणे री प्रक्रिया सुरु व्हेला। उम्मीदवार 31 अगस्त ताई नामजदगी रा पर्चा भर सकेला। 309 स्थानीय निकायां रा चुनाव दो चरणां मांय व्हेला। पैले चरण रो मतदान 9 सितम्बर ने व्हेला वठिने दूजे चरण खातिर 11 सितम्बर ने वोट डाल्या जावेला। वोटों री गिनती 14 सितम्बर ने करी जावेली। नगर परिषद सभापति अर नगरपालिका अध्यक्ष रा चुनाव 21 सितम्बर ने व्हेला इण बीच उम्मीदवारां रा चयन खातिर भाजपा अर कांग्रेस समेत खास दळां रो मंथन तेज व्हे ग्यो है। उम्मीदवारां सूं बॉयोडेटा मंगाणे से साथै ही छंटनी रो काम कर्यो जा रह्यो है। अठिने पार्टियां सूं टिकिट खातिर संभावित उम्मीदवार भी जोर-शोर सूं दमखम दिखा रिया है। इण बीच केन्द्रीय मंत्री अर्जुनराम मेघवाल कह्यो के वां री पार्टी उम्मीदवार चुणणे खातिर स्थानीय विधायक अर संगठन रो भी पक्ष जाणेला। आज बीकानेर मांय सूं बणतल मांय श्री मेघवाल कह्यो की भाजपा रो टिकिट चावण वाळां सूं संकल्प पानो भरवायो जा रह्यो है जको वाणे काम ने दिखावेला।

000

स्थानीय निकाय चुनाव मांय सौ फीसदी मतदान खातिर निर्वाचन आयोग रे हुकम माथे जिला मांय आं दिनां स्वीप गतिविधियां परवान माथे है। लोगां ने मतदान करणे खातिर प्रेरित करणे रे लगस सूं केई नवाचार कर्या जा रह्या है। जागरूकता रैलियां, प्रश्नोत्तरी अर प्रतियोगितावां रा माध्यम सूं मतदातावां ने वोट डालणे रा कर्तव्य याद दिलाया जा रह्या है। बाड़मेर मांय रक्षा बंधन त्यौहार ने भी मतदाता जागरूकता सूं जोड़ने रो नवाचार कर्यो गयो है। वठिने राखियां माथै मतदाता जागरूकता संदेश लिख्या गया है।

000

राज्य मांय आवता दिनां 309 नगरीय निकायां मांय 1 करोड़ 44 लाख सूं बत्ती वोटर आप रे मताधिकार रो प्रयोग कर सकेला। 10 नगर निगम, 47 नगर परिषद अर 252 नगर पालिकावां खातिर दो चरणां मांय वोट डाल्या जावेला। राज्य निर्वाचन आयुक्त राजेश्वर सिंह बतायो के जयपुर नगर निगम मांय सब सूं बत्ती मतदाता हैं। वठिने बूंदी रे इंदरगढ़ मांय सब सूं कम वोटर है। इण बीच चुनाव कामां मांय नियुक्त कार्मिकों रा प्रशिक्षण खातिर कार्यशालावां राखी जा रही है। जिला प्रशासन री कानी सूं गठित टीमां अहलकारां अर कार्मिका ने मतदान प्रक्रिया अर ईवीएम संचालन री जाणकारी देणे रे साथै ही व्यावहारिक अभ्यास भी करा री है। भयमुक्त, पारदर्शी अर स्वतंत्र चुनाव खातिर जिलां मांय प्रशासन कानी सूं खासा इन्तजाम कर्या जा रह्या है। चुनाव कामां खातिर 1 लाख 15 हजार सूं बत्ती कार्मिक नियोजित कर्या गया है।

000

प्रधानमंत्री नरेन्द्र मोदी काले वीडियो कॉन्फ्रेंस रे माध्यम सून खेलो इंडिया संवाद ने संबोधित करेला। राष्ट्रीय खेल दिवस 2026 जळसे रे तैत मेरा युवा भारत – माय भारत कानी सून राखीज्यो ओ कार्यक्रम देश भर मांय राज्यां अर केंद्र शासित प्रदेशां रा हर जिला रा दो कॉलेजां मांय मोटयारां री भागीदारी रे साथै राख्यो जावेला। ओ खेल, युवा नेतृत्व, नागरिक जिम्मेदारी, स्वयंसेवा, फिटनेस अर राष्ट्र निर्माण ने एक साझा मंच प्रदान करेला। इस कार्यक्रम मांय सांसद, विधायक अर जन प्रतिनिधियां रे साथै स्थानीय खेल हस्तियां युवाओं रो उत्साह बधाणे खातिर भेळा व्हेला।

000

राज्य सरकार री आरजीएचएस योजना मांय दवा वितरण माथे लापरवाही बरतणे ने प्रदेश री 215 निजी फार्मेशियां रा लाइसेंस अस्थायी रूप सून निलंबित कर दियो गयो है। चिकित्सा मंत्री गजेन्द्र सिंह खींवर रा हुकम माथे लारला दो महीनां रे चालता आ कार्रवाई करी ज्यी। चिकित्सा महकमा री प्रमुख शासन सचिव गायत्री राठौड़ बतायो के आरजीएचएस मांय दवा वितरण व्यवस्था री लगोतार निगराणी करी जा री है। लंबे बगत सून दवा मुहैया नी कराणे वाली फार्मेशियां ने स्पष्टीकरण देवण रो मौको दियो गयो हो पण संतोषजनक जवाब नी आणे रे कारणे फार्मेशियां रो लाइसेंस निलंबित कर दियो गयो है। बणा बतायो के सबसू बत्ती 39 फार्मसी जयपुर सून बंद करी ज्यी है। श्रीमती राठौड़ कह्यो के राज्य सरकार, लाभार्थियां ने सगळी स्वास्थ्य सुविधावां रो फायदो देणे खातिर प्रतिबद्ध है अर राज्य कर्मचारियां ने बगत माथे दवाइयां मुहैया करावण खातिर आगे भी अनुपालना कार्यवाही करी जाती रहवेली।

000

भारतीय चिकित्सा संघ— आईएमए इन्फ्लूएंजा ए (एच1एन1) रे बढ़ता मामला ने देखता थकां लोगां सून सावचेत रहणे री अरज करी है। आई.एम.ए. रो कहणो है कि घणकर संक्रमण हळका हावे है अर आप ई ठीक हो जावें, इण वास्ते घबराणे री कोई बात नही है। आईएमए लोगां ने फलू रा लक्षणां खातिर डॉक्टर री पर्ची रे बिना एंटीबायोटिक्स नी लेणे री सलाह दी है। आईएमए खास रूप से एजिथ्रोमाइसिन, एमोक्सिसिलिन—क्लैवुलनेट और सेफिक्साइम जीसी एंटीबायोटिक्स खुद नी लेणे री चेतावनी दी है।

000

मुख्यमंत्री कह्यो के वां री सरकार महिला सुरक्षा अर विकास खातिर प्रतिबद्ध है। वणा महिलावां सून जुड़ी जणकल्याणकारी योजनावां ने गिणाता थकां कह्यो की राज्य सरकार प्रदेश री हर महिला री प्रगति खातिर काम कर रही है।

000

भाई—बहन रे प्रेम रो प्रतीक रक्षा बंधन रे त्यौहार मांय महज एक दिन रो बगत शेष रह्यो है। प्रदेशभर मांय राखी मनाणे ने ले र उच्चास रो माहौल है। आ दिनां बाजार रंग-बिरंगी राखियां री अस्थाई दुकानां सून अटेड़ा है। राजधानी जयपुर रा अंदरूनी बाजारां अर बाहरी कॉलोनियां मांय आज छुट्टी रा दिन राखी री खरीददारी परवान माथे री। महिलावां रे आवण जावण री सुविधा खातिर राजस्थान रोडवेज कानी सून भी खास इन्तजाम कर्या गया है। रोडवेज री बसां मांय राज्य सीमा मांय महिलावां ने निःशुल्क जात्रा सुविधा दी गई है। अठिने रेलवे स्टेशनां माथे भी त्यौहारां माथे घरे आवण ने ले र भारी भीड बण्योड़ी है। राखी रे साथै ही केई जगावा माथे रक्षा बंधन जळसा भी राख्या जा रह्या है।

जयपुर रा सांगानेर विधानसभा खेतर मांय आज राख्या गया रक्षा बंधन आयोजन मांय मुख्यमंत्री भजन लाल शर्मा भी शिरकत करी। कार्यक्रम मांय मोटी तादाद मांय महिलावां मौजूद री, जकी मुख्यमंत्री रे राखी बांध र वाणो स्वागत कर्यो। इधर रेलवे स्टेशनों पर भी त्यौहार पर घर लौटने को लेकर भारी भीड बनी हुई है।

000

हजरत मोहम्मद साहब रो जन्म दिवस देश दुनिया मांय ईद मिलादुन्नबी रा रूप मांय मनायो जा रह्यो है। ई ने बाराह बफात भी कह्यो जावे है। ओ दिन अमन, भाईचारा अर मानवता रो प्रतीक है। इण सिलसिला मांय आज पैगंबर मुहम्मद रा जीवन अर शिक्षावां माथे "मिलाद महफिले" अर "सीरत सम्मेलन" राख्या जा रह्यो है। इण मौके माथे मिलाद जुलूस भी निकाळ्या जा रह्यो है। राजधानी जयपुर समेत प्रदेश रा न्यारा-न्यारा शहरां मांय अकीदत अर अहतराम रे साथै निकाळ्या जा रह्यो कानून अर यातायात व्यवस्था रा पुख्ता इन्तजाम कर्यो गया है। जयपुर मांय चार दीवारी थापित जियाउद्दीन चौराहे सूं सरू व्ह्यो जुलूस अंदरूनी इलाकां सूं होतो व्ह्यो कर्बला पहुंचेला। जुलूस मांय भेळा अकीदतमंदां खातिर जगह-जगह खाणे-पीणे री दुकानों समेत छबीली लगाई ज्यी।

000

प्रदेश रा पूर्वी अर दक्षिणी भागां मांय आज केई जगावां माथे मॉनसूनी बादळ मेहरबान रिया। राजधानी जयपुर अर आसे-पासे रा खेतर मांय दोपहरां पाछे चोखी बिरखा व्ही। मौसम महकमों आज जयपुर समेत 19 जिलां मांय बिरखा रो येलो अलर्ट जारी कर्यो है। मौसम महकमो पूर्वी राजस्थान मांय तेज हवावां चालणे अर केई जगावां माथे भारी बिरखा री भी आस जतायी है। है। मौसम विभाग जयपुर केन्द्र रा निदेशक राधेश्याम शर्मा बतायो के बारिश रो मौजूदा दौर 28 अगस्त सूं थमणे रो पूर्वानुमान है।

000